

Қазақстан Республикасына еттің жекелеген түрлерін әкелуге арналған тарифтік квоталарды сыртқы сауда қызметіне қатысушылар арасында бөлу қағидаларын бекіту туралы

Қазақстан Республикасы Ұлттық экономика министрінің 2015 жылғы 20 қаңтардағы № 30 бұйрығы. Қазақстан Республикасының Әділет министрлігінде 2015 жылы 4 ақпанда № 10181 тіркелді.

Ескерту. Бұйрықтың тақырыбы жаңа редакцияда – ҚР Ұлттық экономика министрінің 26.09.2017 № 346 (алғашқы ресми жарияланған күнінен кейін күнтізбелік он күн өткен соң қолданысқа енгізіледі) бұйрығымен.

"Сауда қызметін реттеу туралы" 2004 жылғы 12 сәуірдегі Қазақстан Республикасы Заңының 16-1 бабы 1-тармағының 2) тармақшасына сәйкес **БҰЙЫРАМЫН:**

1. Қоса беріліп отырған Қазақстан Республикасына еттің жекелеген түрлерін әкелуге арналған тарифтік квоталарды сыртқы сауда қызметіне қатысушылар арасында бөлу қағидалары (бұдан әрі – Қағидалар) бекітілсін.

Ескерту. 1-тармақ жаңа редакцияда – ҚР Ұлттық экономика министрінің 26.09.2017 № 346 (алғашқы ресми жарияланған күнінен кейін күнтізбелік он күн өткен соң қолданысқа енгізіледі) бұйрығымен.

2. Сыртқы сауда қызметін дамыту департаменті заңнамада белгіленген тәртіппен:

1) осы бұйрықтың Қазақстан Республикасы Әділет министрлігінде мемлекеттік тіркелуін;

2) осы бұйрықтың "Әділет" ақпараттық-құқықтық жүйесінде және баспа басылымдарында ресми жариялануын;

3) осы бұйрықты Қазақстан Республикасы Ұлттық экономика министрлігінің интернет-ресурсында орналастыруды қамтамасыз етсін.

3. Сауда қызметін реттеу департаменті:

1) тарифтік квота көлемін тарихи өнім берушілер арасында бөлуді осы Қағидаларға сәйкес жүзеге асыруды;

2) еттің кейбір түрлерін әкелуге арналған тарифтік квота көлемдері (бекітілген, қолданылған, бөлінбей қалғандары) туралы мәліметтерді Қазақстан Республикасы Ұлттық экономика министрлігінің интернет-ресурсында жариялауды, тиісті ақпаратты орналастыруды және осы Қағидаларда көрсетілген басқа рәсімдерді қамтамасыз етсін.

Ескерту. 3-тармақ жаңа редакцияда - ҚР Ұлттық экономика министрінің 15.09.2015 № 637 (алғаш ресми жарияланған күнінен кейін күнтізбелік он күн өткен соң қолданысқа енгізіледі) бұйрығымен.

4. Осы бұйрықтың орындалуын бақылау жетекшілік ететін Қазақстан Республикасы Ұлттық экономика вице-министрі жүктелсін.

5. Осы бұйрық алғашқы ресми жарияланған күнінен кейін күнтізбелік он күн өткеннен соң қолданысқа енгізіледі.

Министр

Е. Досаев

"КЕЛІСІЛДІ"

Қазақстан Республикасының
Ауыл шаруашылығы министрі

_____ А. Мамытбеков

2015 жылғы 22 қаңтар

"КЕЛІСІЛДІ"

Қазақстан Республикасының
Қаржы министрі

_____ Б. Сұлтанов

2015 жылғы 20 қаңтар

Қазақстан Республикасы
Ұлттық экономика министрінің
2015 жылғы 20 қаңтардағы
№ 30 бұйрығымен бекітілген

Қазақстан Республикасына еттің жекелеген түрлерін әкелуге арналған тарифтік квоталарды сыртқы сауда қызметіне қатысушылар арасында бөлу қағидалары

Ескерту. Қағида жаңа редакцияда – ҚР Ұлттық экономика министрінің 26.09.2017 № 346 (алғашқы ресми жарияланған күнінен кейін күнтізбелік он күн өткен соң қолданысқа енгізіледі) бұйрығымен.

1-тарау. Жалпы ережелер

1. Осы Қазақстан Республикасына еттің жекелеген түрлерін әкелуге арналған тарифтік квоталарын сыртқы сауда қызметіне қатысушылар арасында бөлу қағидалары (бұдан әрі – Қағидалар) "Сауда қызметін реттеу туралы" 2004 жылғы 12 сәуірдегі Қазақстан Республикасының Заңына (бұдан әрі – Сауда қызметі туралы заң), 2014 жылғы 29 мамырдағы Еуразиялық экономикалық одақ туралы шартқа және "1994 жылғы 15 сәуірдегі Дүниежүзілік сауда ұйымын құру туралы Марракеш келісіміне Қазақстан Республикасының қосылуы туралы хаттаманы ратификациялау туралы" 2015 жылғы 12 қазандағы Қазақстан Республикасының Заңына (бұдан әрі – Заң) сәйкес әзірленген және тарифтік квоталарын сыртқы сауда қызметін реттеу құралы ретінде бөлу тәртібін айқындайды.

2. Осы Қағидаларда мынадай анықтамалар мен ұғымдар пайдаланылады:

- 1) агроөнеркәсіптік кешенді дамыту саласындағы уәкілетті орган – Қазақстан Республикасы Ауыл шаруашылығы министрлігі;
- 2) алдыңғы кезең –тарифтік квота қолданылған жылдың тікелей алдындағы екі жыл ;
- 3) жаңа өнім беруші – осы Қағидаларда белгіленген талаптарға сәйкес келетін, Қазақстан Республикасының салық заңнамасына сәйкес дара кәсіпкер болып табылатын заңды немесе жеке тұлға;
- 4) жоғары сапалы сиыр еті - Қазақстан Республикасының заңнамасында белгіленген тиісті ұлттық стандарттардың талаптарына сай келетін, Еуразиялық экономикалық одақтың Сыртқы экономикалық қызметінің тауар номенклатурасының (бұдан әрі – ЕАЭО СЭҚ ТН) 0201 және 0202 тауар позицияларына енгізілген жас, тоңазытылған немесе мұздатылған ірі қара малдың еті немесе нетто-салмағы 1 000 килограммының құны 8 000 еуродан кем болмайтын сиыр еті;
- 5) кеден ісі саласындағы уәкілетті орган – Қазақстан Республикасы Қаржы министрлігі;
- 6) өнім беруші елдер – Қазақстан Республикасы тауарларды әкелуді кедендік әкелу баждарын төлеуден босатуды көздейтін екі жақты немесе көп жақты келісімдер жасаспаған елдер;
- 7) өңдеуші – Қазақстан Республикасының салық заңнамасына сәйкес дара кәсіпкер болып табылатын, мынадай өлшемшартқа сәйкес келетін заңды немесе жеке тұлға:
Экономикалық қызмет түрлері бойынша өнім жіктеуішінің мынадай кодтарымен жіктелетін ет өнімінің өндірісін тарифтік квота қолданылған жылдың алдындағы жыл ішінде жүзеге асырады:
1013 14 – еттен, қосымша ет өнімдерінен немесе жануарлардың қанынан жасалған шұжық және ұқсас өнімдер;
1013 15 – еттен жасалған дайын жартылай фабрикаттар мен қосымша ет өнімдерінен басқа, еттен, қосымша ет өнімдерінен немесе жануарлардың қанынан жасалған дайын және консервіленген өзге де өнімдер;
- 8) сауда қызметін реттеу саласындағы уәкілетті орган – Қазақстан Республикасының Сауда және интеграция министрлігі;
- 9) сыртқы сауда қызметіне қатысушылар – жаңа өнім берушілер, тарихи өнім берушілер және өңдеушілер;
- 10) тарифтік квота көлемі – Заңына сәйкес квотаішілік мөлшерлемелермен кедендік әкелу баждары салынатын заттай мәндегі тауар саны;
- 11) тарихи өнім беруші – Қазақстан Республикасының салық заңнамасына сәйкес дара кәсіпкер болып табылатын, мынадай өлшемшарттарға сәйкес келетін заңды немесе жеке тұлға:

алдыңғы кезеңде және/немесе тарифтік квота қолданылған жылдың тікелей алдындағы жыл ішінде өнім беруші елдерден тауарды "ішкі тұтыну үшін шығару" кедендік рәсімінде әкелуді жүзеге асырады;

тарифтік квота қолданылған жылдың тікелей алдындағы жыл ішінде тауарды әкелу көлемі коммерциялық пайдалы тауар санынан кем болмауға тиіс;

12) тарихи өнім берушінің тиісті тауар түрін әкелу көлемі – осы тарихи өнім беруші алдыңғы кезеңде өнім беруші елдерден кедендік әкелу баждарының ішкі және квотадан тыс мөлшерлемелері бойынша, Қазақстан Республикасының аумағына "ішкі тұтыну үшін шығару" кедендік рәсімімен әкелген заттай мәндегі тиісті тауар түрінің саны;

13) тауар:

ірі қара мал еті – жоғары сапалы сиыр етін қоспағанда, ЕАЭО СЭҚ ТН-нің 0201 "Ірі қара мал еті, жас немесе тоңазытылған" және 0202 "Ірі қара мал еті, мұздатылған" тауар позицияларына енгізілген ет (бұдан әрі – ІҚМ еті);

құстың аяқтары – ЕАЭО СЭҚ ТН-нің "Мұздатылған сүйегі сылынбаған жартылары немесе ширегі және аяқтары және үй тауықтары мен олардың кесектері (Gallus domesticus)" 0207 14 200 1 және 0207 14 600 1 кодтарымен жіктелген ет (бұдан әрі – құстың аяқтары);

өзге де құс еті – ЕАЭО СЭҚ ТН-нің 0207 14 200 1 және 0207 14 600 1 кодтарын қоспағанда, ЕАЭО СЭҚ ТН-нің 0207 "0105 тауар позициясында көрсетілген ет және үй құсының тағамдық қосымша өнімдері, жас, тоңазытылған немесе мұздатылған" тауар позициясына енгізілген ет (бұдан әрі – өзге де құс еті);

14) тауардың коммерциялық пайдалы саны – тауар көлемі 25 килограмнан астам;

Ескерту. 2-тармаққа өзгеріс енгізілді - ҚР Сауда және интеграция министрінің 14.09.2021 № 525-НҚ (алғашқы ресми жарияланған күнінен кейін күнтізбелік он күн өткен соң қолданысқа енгізіледі) бұйрығымен.

2-тарау. Тарифтік квоталарды бөлу тәртібі

3. Кеден ісі саласындағы уәкілетті орган тоқсан сайын, есепті тоқсаннан кейінгі айдың он бесінші күніне қарай сауда қызметін реттеу саласындағы уәкілетті органға және агроөнеркәсіптік кешенді дамыту саласындағы уәкілетті органға ЕАЭО СЭҚ ТН-нің 0201, 0202, 0207 тауар позициялары бойынша 10 таңба деңгейінде заттай және құндық көлемдері туралы ақпаратты ұсынады.

Ақпарат, әкелуді жүзеге асыратын сыртқы сауда қызметіне қатысушылар, тауарларды шығарған ел және тауар декларацияланған кедендік рәсім көрсетіле отырып, өсу қорытындысымен қоса ұсынылады. Көрсетілген ақпарат тауардың шығарылу күні бойынша қалыптастырылады.

Ұсынылған ақпараттың әр парағына уәкілетті органның кеден ісі саласындағы реттеу, іске асыру және бақылау функцияларын жүзеге асыратын ведомствоның

құрылымдық бөлімшесінің ақпарат алмасуды жүзеге асыруға уәкілетті басшысы қол қояды.

4. Сауда қызметін реттеу саласындағы уәкілетті орган:

сыртқы сауда қызметіне қатысушылардың әрбір санаты үшін тауардың әрбір түрін әкелуге арналған тарифтік квоталарды Сауда қызметі туралы заңына сәйкес бекітеді;

жыл сайын тарифтік квоталар қолданылған жылдың тікелей алдындағы жылдың 1 қазанына дейін интернет - ресурста тарифтік квота туралы ақпаратты орналастырады: түсіндіру үшін байланыс деректерін көрсете отырып, оның қолданылу мерзімі және тауардың әрбір түрі бойынша көлемі, сондай-ақ тарифтік квотаның көлемі шегінде әкелінетін тауарларға қатысты қолданылатын кедендік әкелу баждарының мөлшерлемелері туралы;

жыл сайын осы Қағидаларға сәйкес тарихи өнім берушілер мен жаңа өнім берушілерге бөлінген ІҚМ етін, құстың аяқтарын және өзге де құс етін әкелуге арналған тарифтік квоталарды тарихи өнім берушілер мен жаңа өнім берушілер арасында бөледі;

тарифтік квота қолданылған жылдың алдындағы жылдың 31 желтоқсанына дейін тарихи өнім берушілер үшін айқындалған тарифтік квоталар тарихи өнім берушілер арасында бөлудің осы Қағидаларға сәйкес бірінші кезеңін бекітеді;

тарифтік квота қолданылатын жылдың 15 сәуіріне дейін тарихи өнім берушілер үшін айқындалған тарифтік квоталар тарихи өнім берушілер арасында бөлудің осы Қағидаларға сәйкес екінші кезеңін бекітеді;

жыл сайын тарифтік квота қолданылатын жылдың 1 қаңтарынан бастап 31 желтоқсанға дейін осы Қағидаларға сәйкес айқындалған көлемдерде тарифтік квота қолданылатын тауарлардың импортына сыртқы сауда қызметіне қатысушыларға лицензиялар беруді жүзеге асырады.

5. Агроөнеркәсіптік кешенді дамыту саласындағы уәкілетті орган жыл сайын:

өңдеушілер арасында ІҚМ етін әкелуге арналған тарифтік квоталарын осы Қағидаларға сәйкес бөледі;

тарифтік квоталар қолданылған жылдың тікелей алдындағы жылдың 1 қазанына дейін түсіндіру үшін байланыс деректерін көрсете отырып, интернет - ресурста өңдеушілер арасында бөлінетін тарифтік квотаның көлемін көрсете отырып, тарифтік квоталардың көлемдерін бөлуге қатысу үшін өңдеушілерден Өтінімдер (бұдан әрі – Өтінім) қабылдау туралы хабарландыруды, сондай-ақ өтінімдерді қабылдау мерзімдері туралы ақпаратты орналастырады;

тарифтік квоталар қолданылған жылдың тікелей алдындағы жылдың 1 қарашасына дейін (қоса алғанда) өңдеушілер үшін айқындалған тарифтік квоталарын бөлуге қатысу үшін өңдеушілерден Өтінімдер жинауды жүзеге асырады;

тарифтік квоталар қолданылған жылдың тікелей алдындағы жылдың 20 қарашасына дейін сауда қызметін реттеу саласындағы уәкілетті органға түскен Өтінімдерге сәйкес тарифтік квотаны бөлу жоспарланған өңдеушілердің тізбесін ұсынады;

тарифтік квоталар қолданылған жылдың тікелей алдындағы жылдың 15 желтоқсанына дейін өңдеушілер айқындаған тарифтік квоталарды өңдеушілер арасында осы Қағидаларға сәйкес бөлуді бекітеді;

тарифтік квота қолданылатын жылдың 1 мамырына дейін, интернет - ресурста талап етілмей тарифтік квотаның көлемін көрсете отырып, талап етілмей қалған тарифтік квоталарды бөлуге қатысу үшін өңдеушілерден Өтінімдер қабылдау туралы хабарландыруды, сондай-ақ түсіндіру үшін байланыс деректерін көрсете отырып, Өтінімдердің қабылдану мерзімдері туралы ақпаратты орналастырады;

тарифтік квота қолданылатын жылдың 1 маусымына дейін (қоса алғанда) талап етілмей қалған тарифтік квоталарды бөлуге қатысу үшін өңдеушілерден Өтінімдер жинауды жүзеге асырады;

тарифтік квота қолданылатын жылдың 15 шілдесіне дейін, талап етілмей қалған тарифтік квоталарды өңдеушілер арасында осы Қағидаларға сәйкес бөлуді бекітеді.

6. Сыртқы сауда қызметіне қатысушылардың санаттары арасында тарифтік квоталардың жылдық көлемдерін бөлу мынадай:

тарихи өнім берушілерге: ІҚМ етін әкелуге арналған тарифтік квотаның жылдық көлемінің 54%-ы, құстың аяқтарына - 90% және өзге құс етіне - 90%;

өңдеушілерге: ІҚМ етін әкелуге арналған тарифтік квотаның жылдық көлемінің 44%-ы;

жаңа өнім берушілерге: ІҚМ етін әкелуге арналған тарифтік квотаның жылдық көлемінің 2%-ы, құстың аяқтарына - 10% және өзге құс етіне - 10%;

7. Тарифтік квоталар өнім беруші елдер арасында Еуразиялық экономикалық комиссияның шешімі бойынша алдыңғы кезеңде көрсетілген елдерден әкелу көлеміне пропорционалды түрде бөлінеді.

3-тарау. Тарихи өнім берушілер арасында тарифтік квоталарды бөлу әдісі

8. Тарихи өнім берушілер арасында ІҚМ етін, құстың аяқтарын және өзге құс етін әкелуге арналған тарифтік квоталарды бөлу екі кезеңде жүзеге асырылады.

9. Бірінші кезең шеңберінде тарихи өнім берушілер арасында тауардың әрбір түрі бойынша тарихи өнім берушілер үшін айқындалған тарифтік квоталардың жылдық көлемінің жиырма бес пайызы бөлінеді.

Әрбір тарихи өнім берушінің тарифтік квотасының көлемін есептеу әрбір өнім беруші үшін тауардың әрбір түрі бойынша жеке мынадай формула бойынша жүргізіледі:

$$q_9 = \frac{V_I + V_{II-9}}{V'_I + V'_{II-9}} * 0,25 * Q$$

мұндағы:

q_9 – бірінші кезең шеңберінде есептелген тарихи өнім берушінің тауардың әрбір түрін әкелуге арналған тарифтік квотаның көлемі, килограммен;

Q – тарихи өнім берушілер үшін айқындалған тауардың әрбір түрі бойынша жылдық тарифтік квотаның көлемі, килограммен;

V_I – алдыңғы кезеңнің бірінші жылында тарихи өнім берушінің тауардың тиісті түрін әкелу көлемі, килограммен;

V_{II-9} – тарифтік квота қолданылатын жылдың алдындағы жылдың тоғыз айында тарихи өнім берушінің тауардың тиісті түрін әкелу көлемі, килограммен;

V'_I - тарифтік квота қолданылатын жылдың тікелей алдындағы жылдың тоғыз айы ішінде тауардың тиісті түрін әкелуді жүзеге асыратын барлық тарихи өнім берушілердің алдыңғы кезеңнің бірінші жылында тауардың тиісті түрін әкелу көлемі, килограммен;

V'_{II-9} - тарифтік квоталар қолданылатын жылдың тікелей алдындағы жылдың тоғыз айында осы кезеңде ішінде тауардың тиісті түрін әкелуді жүзеге асыратын барлық тарихи өнім берушілердің тауардың тиісті түрін әкелу көлемі, килограммен.

10. Екінші кезең шеңберінде тарихи өнім берушілердің арасында тауардың әрбір түрі бойынша тарихи өнім берушілер үшін айқындалған тарифтік квоталардың жылдық көлемінің жүз пайызы бөлінеді.

Әрбір тарихи өнім беруші үшін тарифтік квотаның көлемін есептеу тауардың әрбір түрі бойынша жеке мынадай формула бойынша жүргізіледі:

$$q_{12} = \frac{V}{V'} * Q - q_9$$

мұндағы:

q_{12} – екінші кезең шеңберінде есептелген тарихи өнім берушінің тауардың әрбір түрін әкелуіне арналған тарифтік квотаның жылдық көлемі, килограммен;

Q – тарихи өнім берушілер үшін айқындалған тауардың әрбір түрі бойынша жылдық тарифтік квотаның көлемі, килограммен;

q_9 – бірінші кезең шеңберінде тарихи өнім берушіге бөлінген тауардың тиісті түрін әкелуге арналған тарифтік квотаның көлемі, килограммен;

V – алдыңғы кезеңде тарихи өнім беруші жүзеге асырған тауардың тиісті түрін әкелу көлемі, килограммен;

V’–тарифтік квота қолданылатын жылдың тікелей алдындағы жылы тауардың тиісті түрін әкелуді жүзеге асырған барлық тарихи өнім берушілердің алдыңғы кезеңде тауардың тиісті түрін әкелу көлемі, килограммен.

11. ІҚМ етінің әрбір тарихи өнім берушісі үшін тарифтік квотаның көлемін есептеу кезінде ол әкелген жоғары сапалы сиыр етінің көлемі осы тарихи өнім берушілерге ІҚМ етін әкелу көлемі есепке алынбайды.

Әкелінген жоғары сапалы сиыр етінің көлемі алдыңғы кезеңде сондай-ақ көрсетілген алдыңғы кезеңге ІҚМ етінің барлық тарихи өнім берушілерінің әкелу көлемі есепке алынбайды.

12. Осы Қағидалардың 9 және 10-тармақтарында көрсетілген формулалар бойынша жүргізілген есептеулердің нәтижелері математикалық түрде тұтас санға дейін дөңгелектенеді (килограмм мәніне дейін).

13. Егер осы Қағидалардың 9 және 10-тармақтарына сәйкес есептелген тарихи өнім берушінің тауардың қандайда бір түрін әкелуге арналған тарифтік квотаның көлемі коммерциялық пайдалы санынан кем болса, онда осындай осы тауар түрі бойынша тарихи өнім берушіге тарифтік квота бөлінбейді. Бұл ретте ол әкелген тауардың тиісті түрінің көлемі қалған тарихи өнім берушілерге тарифтік квотаның көлемдерін есептеу кезінде алдыңғы кезеңде әкелінген тауардың осы түрінің жалпы көлемінде есепке алынбайды.

14. Егер ол тауардың осы түрін өңдеуші болып табылса, ІҚМ етін әкелуге арналған тарифтік квота тарихи өнім берушіге бөлінбейді.

Осындай тарихи өнім берушілер әкелген ІҚМ етінің көлемі қалған тарихи өнім берушілерге тарифтік квотаның көлемдерін есептеу кезінде алдыңғы кезеңде әкелінген тауардың осы түрінің жалпы көлемінде есепке алынбайды.

15. Лицензияның қолданылу мерзімі аяқталғаннан кейін күнтізбелік он бес күннің ішінде тарихи өнім берушілер сауда қызметін реттеу саласындағы уәкілетті органға тарифтік емес реттеу шараларын қолдану туралы Еуразиялық экономикалық комиссиясының шешімімен бекітілген нысан бойынша кеден ісі саласындағы уәкілетті орган беретін лицензияның орындалғаны туралы анықтама ұсынады.

4-тарау. Жаңа өнім берушілер арасында тарифтік квоталарды бөлу әдісі

16. Тарифтік квоталарды бөлуге қатысу үшін жаңа өнім берушілер сауда қызметін реттеу саласындағы уәкілетті органға Еуразиялық экономикалық комиссиясының шешімімен бекітілген тауардың жекелеген түрлерінің экспортына және (немесе) импортына рұқсат рәсімдеу туралы нұсқауға сәйкес тауардың әрбір түрі бойынша еттің жекелеген түрлерінің импортына арналған лицензия беруге Өтініш (бұдан әрі – Өтініш) береді.

Өтініштер тарифтік квота қолданылатын жылдың бірінші наурызынан бастап беріледі.

Көрсетілген күннен бұрын ұсынылған Өтініштер қараусыз қайтарып беріледі.

17. Сауда қызметін реттеу саласындағы уәкілетті орган Өтініштерді қарайды және Өтініштер беру кезегінің тәртібімен еттің жекелеген түрлерінің импортына арналған лицензияларды береді.

Еттің жекелеген түрлерінің импортына арналған лицензияларды Өтініште көрсетілген сан бойынша жаңа өнім берушілер үшін айқындалған жылдық тарифтік квотаның жалпы көлемінен әр жаңа өнім беруші үшін он бес пайыздан аспайтын көлемде, жаңа өнім берушілер үшін көзделген тарифтік квоталар көлемдері таусылғанға дейін беріледі.

18. ИҚМ етін өңдеуші тауардың осы түрінің жаңа өнім берушісі бола алмайды.

Қазақстан Республикасының салық заңнамасына сәйкес дара кәсіпкер болып табылатын заңды немесе жеке тұлғалар, егер олар тауардың осы түрінің тарихи өнім берушісі болып табылса, тауардың жаңа өнім берушісі бола алмайды.

19. Сауда қызметін реттеу саласындағы уәкілетті орган апта сайын тарифтік квота қолданылатын жылдың наурыз айынан бастап аптаның соңғы жұмыс күнінде лицензиялар берілген тарифтік квоталардың көлемдері мен тарифтік квота таусылғанға дейін тауардың әрбір түрі бойынша бөлінбей қалған көлемдері туралы мәліметтерді интернет - ресурста жариялайды.

20. Лицензияның қолданылу мерзімі аяқталғаннан кейін күнтізбелік он бес күннің ішінде жаңа өнім берушілер сауда қызметін реттеу саласындағы уәкілетті органға тарифтік емес реттеу шараларын қолдану туралы Еуразиялық экономикалық комиссиясының шешімімен бекітілген нысан бойынша кеден ісі саласындағы уәкілетті орган беретін лицензияның орындалғаны туралы анықтама ұсынады.

21. Егер жаңа өнім беруші берілген лицензия бойынша тауар әкелуді жүзеге асырмаған жағдайда, ол тауардың осы түрі бойынша кейінгі екі жылда жаңа өнім беруші ретінде тарифтік квоталарды бөлуге қатысу мүмкіндігінен айырылады.

Осындай жаңа өнім берушінің Өтініштері қараусыз қайтарып беріледі.

Осы тармақтың ережелері жаңа өнім берушіге қолданымайды, егер ол еттің жекелеген түрлерінің импортына берілген лицензияны қолданылу мерзімі аяқталғанға дейін қайтарса.

22. Жаңа өнім беруші лицензияның қолданылу мерзімі аяқталғанға дейін еттің жекелеген түрлерінің импортына арналған, өзіне берілген лицензияны қайтарған жағдайда, жаңа өнім беруші пайдаланбаған тарифтік квотаның көлемі қайта бөлуге жатады.

Лицензияның қолданылуын тоқтату туралы шешім қабылданған күннен бастап үш жұмыс күні ішінде сауда қызметін реттеу саласындағы уәкілетті орган интернет - ресурсқа тауардың тиісті түрін әкелуге арналған, тарифтік квоталардың пайдаланылмаған көлемдері туралы хабарландыруды орналастырады.

Тарифтік квотаның пайдаланылмай қалған көлемдері шеңберінде тауарларды әкелуге лицензия алу үшін жаңа өнім берушілердің өтініштері хабарландыру жарияланған күннен бастап бес жұмыс күні өткен соң қабылданады. Аталған көлемдер осы Қағидалардың 16 және 17-тармақтарында белгіленген ережелерге сәйкес бөлінеді.

5-тарау. Өңдеушілер арасында тарифтік квоталарды бөлу әдісі

23. Өңдеушілер арасында ІҚМ етін әкелуге арналған тарифтік квоталарды бөлуді агроөнеркәсіптік кешенді дамыту саласындағы уәкілетті орган жүзеге асырады.

24. Тарифтік квоталарды бөлуге қатысу үшін өңдеушілер агроөнеркәсіптік кешенді дамыту саласындағы уәкілетті органға мынадай құжаттарды ұсынады:

әкелуге жоспарланған ІҚМ етінің көлемін, Өтінім берілген жылдың алдындағы толық жылда және Өтінім берілген жылдың тоғыз айында дайын тауардың әрбір түрінде дайын өнімді өндіру кезінде пайдаланылған шикізат көлемінде ІҚМ етінің үлесін көрсете отырып, осы Қағидаларға 1-қосымшаға сәйкес нысан бойынша Өтінімді;

кәсіпорынның (дара кәсіпкерлер үшін – тамақ өнімдерін өндіретін (дайындайтын) объектіге есептік нөмір беру туралы (растау) анықтаманы) Өтінім берілген күннің алдындағы толық жылда және Өтінім берілген жылдың тоғыз айында құжаттың қабылданғаны туралы статистика органының белгісі бар өнімді өндіру және жөнелту туралы статистика органдарына есебінің нотариат растаған көшірмесін (не салыстырып тексеру үшін құжаттың түпнұсқасын міндетті түрде ұсынған кезде көшірмені) ұсынады.

25. Егер барлық өңдеушілердің Өтінімдерінде көрсетілген ІҚМ етінің көлемі өңдеушілер үшін айқындалған тарифтік квота көлеміне тең немесе одан аз болса, онда тарифтік квота өңдеушілер арасында сұратылатын көлемдерге сәйкес бөлінеді.

26. Егер барлық өңдеушілердің Өтінімдерінде көрсетілген ІҚМ етінің көлемі өңдеушілер үшін бөлінген тарифтік квота көлемінен асып кетсе, онда тарифтік квотаның көлемі өңдеушілер арасында мынадай формулалар бойынша бөлінеді:

1)

$$V_{\text{тұтыну}} = \frac{P * K * S}{100\%};$$

мұндағы:

$V_{\text{тұтыну}}$ – Өтінім берілген күннің алдындағы толық жылда ет өнімдерін өндіру үшін өңдеуші пайдаланған ІҚМ етінің көлемі, килограммен;

P – кәсіпорынның өнімді өндіру және жөнелту туралы статистика органдарына беретін Өтінім берілген күннің алдындағы толық жылдағы есебінде (дара кәсіпкерлер үшін – тамақ өнімдерін өндіретін (дайындайтын) объектіге есептік нөмір беру туралы (

растау) анықтамада) көрсетілген, өңдеуші өндірген ет өнімдерінің көлемі, килограммен ;

K – осы Қағидаларға 2-қосымшаға сәйкес ет өнімдерін етке ауыстыру коэффициенті ;

S – Өтінім берілген күннің алдындағы толық жылда дайын өнімді өндіру кезінде пайдаланылған шикізаттың жалпы көлеміндегі ет өнімдерін өндіру кезінде және өнім беруші елдерден әкелінген ІҚМ етінің үлесі, пайыздық мәнде;

2)

$$D = \frac{V_{\text{тұтыну}}}{\sum V_{\text{тұтыну}}} * 100\% ;$$

мұндағы:

D – Өтінім берген барлық өңдеушілердің ІҚМ етін тұтынуының жалпы көлемінде әрбір өңдеушінің үлесі, пайыздық мәнде;

$\sum V_{\text{тұтыну}}$ – Өтінім берілген күннің алдындағы толық жылда барлық Өтінім берген өңдеушілер тұтынған ІҚМ етінің жиынтық көлемі, килограммен;

3)

$$V'_{\text{трq}} = \frac{V_{\text{трq}} * D}{100\%} ;$$

мұндағы:

$V'_{\text{трq}}$ – әрбір нақты өңдеуші үшін есептелген ІҚМ етін әкелуге арналған тарифтік квотаның көлемі;

$V_{\text{трq}}$ – өңдеушілер үшін ІҚМ етін әкелуге арналған тарифтік квотаның жалпы көлемі ;

27. Егер өңдеуші өтінім берген ІҚМ етін әкелуге тарифтік квотаның көлемі осы Қағидалардың 26-тармағында көрсетілген формулалар бойынша, осы кәсіпорын үшін есептелген тарифтік квотаның көлемінен аз болса, онда өңдеушіге тарифтік квотаның өтінім берілген көлемі бөлінеді. Тарифтік квотаның қалған көлемі қалған өңдеушілер арасында ІҚМ етін тұтынудың жалпы көлеміндегі олардың үлестеріне пропорционалды түрде бөлінеді.

28. Осы Қағидалардың 26-тармағында көрсетілген формулалар бойынша жүргізілген есептеулердің нәтижелері математикалық түрде тұтас санға дейін дөңгелектенеді (килограмм мәніне дейін).

29. Егер есептеу нәтижелері бойынша өңдеушіге бөлінген тарифтік квотаның көлемі тауардың коммерциялық пайдалы санынан кем болса, онда тарифтік квота мұндай өңдеушіге бөлінбейді, ал ол тұтынған ІҚМ етінің көлемі қалған өңдеушілерге тарифтік квотаның көлемдерін есептеу кезінде ет өнімдерін өндіру үшін пайдаланылған ІҚМ етінің жалпы көлемі есепке алынбайды.

30. Лицензияның қолданылу мерзімі аяқталғаннан кейін күнтізбелік он бес күннің ішінде өңдеушілер сауда қызметін реттеу саласындағы уәкілетті органға тарифтік емес реттеу шараларын қолдану туралы Еуразиялық экономикалық комиссиясының шешімімен бекітілген нысан бойынша кеден ісі саласындағы уәкілетті орган беретін лицензияның орындалғаны туралы анықтама ұсынады.

31. Кедендік әкелу баждарын төлеуден босатылуы болжанатын кедендік рәсімдерде ІҚМ етін әкелуді жүзеге асыратын өңдеушілерге тарифтік квота бөлінбейді.

Кедендік баждарды төлеуден босату іс-қимылдары тоқтатылған жағдайда, осындай өңдеушілер тарифтік квоталарды бөлуге жалпы негізде қатысады.

32. Агроөнеркәсіптік кешенді дамыту саласындағы уәкілетті орган жыл сайын:

1) 1 қаңтардан бастап 1 қазанға дейін іс жүзінде әкелінген ІҚМ еті туралы деректерді ағымдағы жылғы бірінші жартыжылдықта өңдеушілер өндірген ет өнімінің көлемімен салыстырып тексереді;

2) есепті жылдан кейінгі жылдың 1 сәуіріне дейін іс жүзінде әкелінген ІҚМ еті туралы деректерді толық өткен жылы өңдеушілер өндірген ет өнімінің көлемімен салыстырады.

Егер өңдеушінің ІҚМ етін әкелу көлемі ІҚМ етіне қайта есептеген кезде өзі өндірген ет өнімінің көлемінен асып кеткен жағдайда, онда аталған өңдеуші кейінгі жылға тарифтік квоталардың көлемдерін бөлуге қатысу мүмкіндігінен айырылады.

33. Бөлінген тарифтік квота көлемін пайдаланбаған өңдеушілер кейінгі жылы тарифтік квоталарды бөлуге қатыспайды.

Тарифтік квоталарды кейінгі жылдарға бөлу кезінде тарифтік квотаның бөлінген көлемін ішінара пайдаланған өңдеушілер үшін тарифтік квотаның мөлшері бұрын әкелінген көлемнен аспайтын деңгейде белгіленеді.

Қазақстан Республикасына
еттің жекелеген түрлерін
әкелуге арналған тарифтік
квоталардың көлемдерін сыртқы
сауда қызметіне қатысушылар
арасында бөлу қағидаларына
1-қосымша
Нысан

Өтінім

(өңдеушінің толық атауы)

Мыналарды ІҚМ етінің (коды ЕАЭО СЭҚ ТН 0202)

_____ тонна көлемінде) импортына квота бөлуді сұрайды.

Біздің кәсіпорнымызда дайын өнім өндірісінде ет шикізаты түрлерінің арақатынасы мынадай:

Дайын өнімнің атауы	Өндірістің көлемі (өтінім берілген күннің алдындағы толық жылда және өтінім берілген жылдың тоғыз айында)	Дайын өнім өндіру кезінде пайдаланылатын ІҚМ етінің* үлесі, %

Өкелінетін шикізатты мақсатына қарай пайдалануға міндеттенеміз.

Бірінші басшы _____ (Тегі, аты, әкесінің аты (болған жағдайда))

Мөр орны (күні)

Ескерту:

ІҚМ еті* - ірі қара мал еті

Қазақстан Республикасына
еттің жекелеген түрлерін
әкелуге арналған тарифтік
квоталардың көлемдерін сыртқы
сауда қызметіне қатысушылар
арасында бөлу қағидаларына
2-қосымша

Ет өнімдерін етке аудару коэффициенттері

Өнім	Коэффициент
Шұжық өнімдері (орташа коэффициент)	1,37
Пісірілген шұжықтар, жіңішке шұжықтар, сардельдер	1,2
Жартылай ысталған шұжықтар	1,7
Пісіріліп ысталған шұжықтар	2,0
Шикілей ысталған шұжықтар	2,5
Ет консервілері:	
Шартты банкілерден қайта есептеу үшін	0,5
Салмағынан (тонна) қайта есептеу үшін	1,4
Ет-өсімдік консервілері	0,43